

Euskal PEN Kluba sortu da

Juan Luis Zabala

Historian hirugarrenegoz, euskal literaturak aurki izango du ordezkari-tza propioa mundu osoko idazleen babeserako sortutako PEN Klubean. Euskal PEN Klubaren sortze bilera egin zen joan den apirilaren 23an, Donostian, eta datorren irailean izango du onarpen ofiziala elkarte horrek, Norvegiako Tromso hirian, Nazioarteko PEN Klubaren urteroko batzar nagusiaren barruan.

Onarpen ofizial hori eskuratzeko idazle, kantagile, gidoigile, kazetari eta abarren artean, Nazioarteko PEN Klubaren gutunaren onarpena sinatu duten eta kuota ordaindu duten 20 lagun-en babesa behar da, eta Euskal PEN Kluba abian jarri duten sortzaileek 28 lagun-en baiezkoa ziurtatua zuten bilera hori egin zenerako. Dokumentazioa ekainean bidaltzen dutenerako idazle gehiagoren babesa izango dutela ziur dira ekimenaren sustatzaileak.

Euskal PEN Klubeko bazkide izateko baldintzak honako hauek dira:

- euskarazko idazlanak argitaratzea, edozein adarretakoak: literatura, gidoigintza, saiakera, dibulgazioa, historia, kazetaritza, kantagintza...
- estatutuak onartzea.
- Nazioarteko PEN Klubaren gutuna sinatzea.
- kuota ordaintzea (40 euro urteko).

Bazkideen eskubideen artean, berriz, honako hauek daude, besteak beste: batzar orokorrean parte hartu, zuzendaritzari eskaerak eta galderak egin, ekintzen eta ekimenen berri jaso... Batzar

Orokorra izango da Euskal PEN Klubaren sail gorena, eta gutxienez urtean behin bilduko da.

Laura Mintegi lehendakari

Elkartearen izena Euskal PEN Kluba izango dela erabakitzeaz gain, zuzendaritza batzordearen osaketarako proposamena ere egin zen apirilaren 23ko batzarrean. Ohorezko lehendakaria Txomin Peillen izatea proposatu zen; lehendakaria, Laura Mintegi; lehendakariordea, Joxemari Iturralde; idazkaria, Eider Rodriguez; diruzaina, Lutxo Egia; zuzendaritza batzordekoak, Teresa Toda, Paddy Rekalde, Asier Serrano eta Fito Rodriguez.

Lau helburu nagusi izango ditu Euskal PEN Klubak, bere estatutuek diotenaren arabera:

- idazleen adierazpen askatasuna defenditu.
- idazleen arteko adiskidetasuna eta elkarkidetzaren eragin
- idazleen interesen alde egin.
- pentsamenduaren elkartrukatzearekin, giro aske batean, literaturaren zabalkuntzan lagundu.

Eremu geografikoari dagokionez, Euskal PEN Klubak ez dauka inolako muga fisikorik, euskal hiztunak dauden leku guztietara dago zabalik bere ekimena. Euskal Idazleen Elkartearen babesa eta laguntza du Euskal PEN Klubak. Egoitza Bilbon izango du Euskal PEN Klubak, Euskal Idazleen Elkarteak utziko dion lokal batean.

Nazioarteko PEN Klubak estatu bakoitzeko bost PEN klub baino ez ditu onartzen, eta PEN klub berria sortzeko estatu berean aurretik dauden gainerako guztien onarpena behar du derrigorrez. Euskal PEN Kluba, arau horri dagokionean, Espainiako Estatuan dago kokatua, baina ez du inolako oztoporik izango: Espainiako Estatuan beste hiru PEN klub daude egun (Kataluniakoa, Galiziakoa eta Espainiakoa,) eta horiek ez dute inolako oztoporik jarriko Euskal PEN Klubaren sorrerarako.

Kataluniako PEN Klubak laguntza eta adore handia eman die, hasieratik, Euskal PEN Klubaren sustatzaileei. Kataluniako PEN Klubeko kideek interes handia agertu dute Iñaki Uria *Euskaldunon Egunkaria*-ko kontseilari ordezkari ohiaren kasuaren inguruan. 2003ko

otsailaz geroztik espetxeratua dago Uria, eta Nazioarteko PEN Klubaren batzordeetako bat preso dauden idazleez arduratzen da, haiei laguntza eta babesa eman nahian.

Aurretik beste bi saio

2004an abian jarri berri den honen aurretik, beste bi ahalegin izan dira euskal idazleen PEN Kluba sortzeko: 1951n bata, 1987an bestea.

1951ean, Andima Ibiñagabeitiak, Jokin Zaitegik, Jon Mirandek eta bestek PEN Euskal Bilkura sortu zuten, eta izaera ofiziala izatera heldu zen elkarte hura, izen horrekin, urte horretan Eskozian egin zen batzar nagusian. 1987ko saioan *Argia* aldizkariaren inguruan zebiltzan idazleek hartu zuten parte nagusiki.

Aurreko bi ahalegin horiek ez zuten bultzatzaileek nahiko zuketan sendotasunik lortu, baina Euskal PEN Klubaren egungo bultzatzaileak ziur dira orain abian jarritako ekimenak iritsiko duela aurrekoek falta izan zitzairen sendotasun hori, eta emango dituela fruituak.

KRITIKAK ETA
ERRESEINAK